

Ulasan Buku/Book Reviews

Dakwah dan Etika Politik di Malaysia oleh Zulkiple Abd.Ghani dan Mohd.Syukri Yeoh Abdullah (pnyt.). Kuala Lumpur: Utusan Publications & Distributors Sdn. Bhd. 2005. 323 halaman.

Ulasan oleh: ABDUL GHAFAR BIN DON

Dakwah dan politik adalah dua tema yang berbeza yang melahirkan implikasi yang juga berbeza. Pada amnya, massa melihat dakwah sebagai sesuatu yang sacral, manakala politik pula seringkali diasosiasikan dengan sesuatu yang negatif, kotor dan penuh muslihat. Justeru, tidak hairanlah ada menolak dari melibatkan diri dalam berpolitik, malah ada yang beranggapan politik tidak ada dalam Islam. Apakah pernyataan ini merupakan satu pernyataan yang benar dan mutlak? Apakah penyelesaian atau jawapan kepada persoalan-persoalan ini yang sering menjadi perdebatan, perbincangan dan pertanyaan umum? Oleh itu, buku ini mungkin jawapan yang tuntas kepada pertanyaan-pertanyaan tersebut.

Buku berjudul “Dakwah dan Etika Politik Di Malaysia ini”, hasil suntingan Zulkiple Abd.Ghani dan Mohd.Syukri Yeoh Abdullah cuba merungkai permasalahan politik dari pelbagai dimensi. Penulis-penulisnya adalah terdiri dari para akademis aatau ilmunan Islam yang mengutarakan idea-idea yang segar hasil kajian masing-masing. Buku ini dibahagikan kepada tiga bahagian utama dan dipecahkan kepada dua puluh tiga bab. Bahagian Satu ialah tentang “Pemikiran dan Pengalaman Dakwah-Politik”. Bahagian Dua mengemukakan isu-isu berkisar kepada “Adab Berpolitik dalam Islam” manakala Bahagian Tiga pula mengenengahkan isu-isu tentang “Integrasi Dakwah-Politik Malaysia”.

Bahagian satu yang mengandungi lapan bab menumpukan perbincangan kepada aspek pemikiran berkaitan politik dan dakwah serta integrasi antara keduanya. Para penulis telah membawa pandangan tokoh-tokoh Islam tersohor yang membincangkan tentang teori politik, dakwah dan kenegaraan seperti al-Mawardi dan Sayyid Qutb.

Bahagian kedua buku ini juga mengandungi lapan bab kesemuanya mengupas isu-isu berkaitan kematangan politik, akhlak dan etika dalam berpolitik, pengurusan perbezaan pendapat (adab al-ikhtilaf) dalam politik, pendekatan hikmah dan psikologi dalam berpolitik serta seni pengucapan politik khususnya pengucapan awan atau retorik.

Elemen pengalaman berpolitik dibincangkan dalam bahagian tiga iaitu bahagian akhir buku ini yang terdiri daripada tujuh bab. Antara pengalaman yang diutarakan dalam bahagian tiga ini ialah kebebasan berpolitik dalam perlembagaan persekutuan, pengalaman NGO seperti ABIM dan Al-Arqam dalam kancah politik Malaysia serta tidak ketinggalan penglibatan wanita dalam mencorak dan menentukan hala tuju politik di Malaysia. Pola pemikiran politik India Muslim juga dibincangkan dalam salah satu artikel dalam buku ini.

Secara umumnya buku ini sesuai untuk dijadikan bahan bacaan bagi para pengkaji, pelajar institusi pengajian tinggi malah pembaca umum yang berminat menimba ilmu pengetahuan keIslaman khususnya berkaitan isu-isu dakwah dan politik. Malah para ahli politik juga amat wajar membaca buku ini agar menjadi panduan dalam berpolitik berlandaskan syariah Islamiah. Bahasa dan penyampaian buku bersahaja dan mudah difahami oleh semua. Oleh itu, tidaklah keterlaluan jika dikatakan bahawa buku ini dapat membantu meningkatkan kefahaman masyarakat tentang ilmu-ilmu Islam terutamanya dalam politik dan dakwah, serta telah menyumbang kepada penambahan dan pengayaan korpus ilmu Islam di Negara ini khususnya dan dunia amnya.

ABDUL GHAFAR DON, PhD.
Jabatan Pengajian Dakwah dan Kepimpinan,
Fakulti Pengajian Islam,
43600 Universiti Kebangsaan Malaysia,
Bangi, Selangor, Malaysia.
e.mail: a.g.don@ukm.my